

बणावण आळा:-

गंगाराम अर रतन लाल योगी

मदत करणाळा:-

मुकेश कुमार योगी अर मारवाडी समुदाय




nirmaan
empowering communities

अपोरो मारवाड़, अपोरी बोली मारवाड़ी तिमाई पतरिका

जनवरी ॐ मार्च-2020

शुक्रवार

1. दुनिया में की सबोऊं बढिया सोचणो है तो सबोऊं पेली किनोई बूरो सोचणो छोड दो।
2. पंछी आपरे पगो रे कारण जाळ में फसे अर मिनक आपरी जुबानऊं।
3. सुख मिनक रे अहंकार अर दुख मिनक रे धैर्य री परिक्षा लेवे है।

अपोरो मारवाड़, अपोरी बोली
मारवाड़ी तिमाई पतरिका
जनवरी ॐ मार्च-2020


nirmaan
empowering communities

करोना वायरस

हमार संसार में एक महामारी फेल री है। जिकी रो नाम करोना वायरस है। जिको पेली बार चीन देस रे वुहान राज्य में 2019 में पेली बार स्रोमी आयो हो। आज ओ पूरे संसार में फेल गियो है। ओ एक सा रो रोग है जिको ओंख, नाक अर मुण्डेऊं होन फेफड़ो ताई जावे है अर सा तंतर ने प्रभावित करे है।

लकसण

- ताव आवणो
- गळे में खरास
- सा लेवण में तकलीफ

केई मोमलो में डील दुखणो, दस्त, सरीर में कमजोरी जेड़ा लकसण दिख सके है।

प्रभाव

ओ मिनक रे ओंख, नाक अर मुण्डेऊं होन गळे में जावे गळे में ओ दो-तीन दिन रेया करे है जिके रे कारण खरास, गळे में दर्द हो सके है। इनो प्रभाव एकऊं दो हफता ताई तो नोर्मल रेवे है कोई खास परेसानी नी करे है। इणू जादा टेम जियो के दोऊं -तीन हफतों में इनो मोमलो गंभीर हो जावे है।

बचाव

इण वास्ते कोई खास दवाई नी बणी है केई सावधोनियो है जिके ऊं इणू बचियों जा सके है।

- टेमो-टेम आपरा हाथ साबुऊं धोवणा।
- सेनिटाईजरऊं आपरा हाथ आच्छा करणा।
- साफ-सफाई रो ध्योन राखणो।
- कोई चीज 8-10 घण्टो पछे काम में लेणी।
- बारु कोई चीज लावो बढिया धो अन पछे काम में लेवो।
- एक दूजेऊं हाथ नी मिळावणो राम-रामऊं काम चलावणो।
- बात करती टेम एक मीटर या जिती हो सके सली छेटी राखो।
- आपरा ओंख, नाक अर मुण्डे ने घड़ी-घड़ी नी छुवणा।
- जिता हो सके एकला रेवण री कोसिस करो या घर में रेवो।
- भारत अर राज्य सरकार रे आदेशों रो पालण करो।
- झुठी अफवाहों अर बातों माथे विस्वास मती करो।
- सिर्फ डब्लुएचओ या भारत सरकार री दियोड़ी जाणकारी माथे विस्वास करो।



कहानी

एक बार एक राजा आपरे राज्य री सैर वास्ते निकळ्या। राजा घूमता घुमता गाँव रे बारले पाड़े पुगग्या। उठे एक किसोन रेवतो हो। बो किसोन गरीब हो। जिके रे रेवण वास्ते सकरो घर नी हो। तोई बो आपरे टाबरो अर लुगाई रे साथे राजी-खुसी अर प्रेम ऊं रेवतो हो। राजा मन में विचार करियो रे इण खने की नी है तोई ओ इतो खुस रेवे है। म्हारे खने सब सुख है तोई में इण जितो राजी नी रे सकू हूँ। आ बात राजा आपरे मंतरी ने केई। तो मंतरी केयो के राजा साब अजे ओ निनाणू रे फेर ऊं बारे है। राजा ने निनाणू री बात समज नी आई। राजा केयो ओ निनाणू रो कांई फेर है। मंतरी केयो के राजा साब आप म्हने निनाणू मौरो देवो अर एक महिने पछे आप उण किसोन ने देखजो। राजा निनाणू मौरो दे दी। मंतरी बे मौरो ले जान किसोन री झुपड़ी रे बारे रख दी। जद किसोन बे मोरो देखी अन गिणी तो निनाणू ही। जणे बो पुरी सौ मौरो करणे वास्ते दिनरात मेनत करण लागो। टेम माथे रोटी नी खावतो। मौरो पुरी सौ करण रे वास्ते दर दर भटकण लागो। अर दूखी रेवण लागो। अर इण दुख री वजेह ऊं घर में लड़ाई झगड़ा होवण लागो। इयो करतो-करतो महिनो बीत गियो। जणे मंतरी राजा ने लेन पाछो ऊण किसोन रे घरे लेन गियो। राजा देखे तो सगळा दुखी हाँ। टाबरियो री हालत खराब ही। जणे राजा मंतरी ने पुछियो के आ किकर हुगी। जणे मंतरी केयो के राजा साब ओ किसोन निनाणू मौरो ने पूरी सौ करण रे चक्कर में दुखी हो गियो है।

सिक्सा- मिनक ने जितो होवे उण में ई राजी रेवणो जोईजे है।

मुहावरा

1. बोनदरी ने लादी ब्राटकी, पी-पी अन फाटी-जिकी चीज रो कोई मतलब नी बा बात करणी।
2. गोरे रे खने काळो बेठो, रंग नी तो गुण ले लेई है-जेडे रे खने बेई बेड़ा लकण पड़ जाई है।
3. लाडे री भुआ बणणी-बिने मतलब पंचाती करणी।
4. जोंण नी पेचोण में थारो मेमोन-बिने मतलब गळे पड़णो।
5. स्लाडी बारे में होवणो-किनी चीज रो ध्योन नी होवणो।

कहावतों

1. गा मारन गंगाजी गया पाछा आन कुत्ती मारदी।
अर्थ:-जेड़ा हुता वेड़ा होग्या
2. ग्योनी ने ग्योनी मिळिया करी ग्योन री बात, मूर्ख ने मूर्ख मिळिया के मुक्को ने के लात।
अर्थ:-जेड़ा गुण होय जेड़ी बात करी है।
3. आज मरते ने काल कद आवे।
अर्थ:-जिकी री आज जरुत है उनो काले कोई मतलब नी है।

भजन

म्हारा भंवरा रे

ऐ म्हारा भंवरा रे भाळ जोवे ने पग धरना रे (टेर)
उचे सरवर रो हंसा संगडो नी करणा

नीचे पडियोडा फळ लेणा रे म्हारा भंवरा रे
जोवे जमी पे पग धरणा रे.....

गेरा सम्न्दर रो हंसला संगडो नी करणा
पाळ बैठे पग धोणा रे म्हारा भंवरा रे
जोवे रे जमी पर पग धरणा रे
पराया खेतो में हंसला फसल नहीं बावणा र
हासल हाथ नहीं आवे रे म्हारा भंवरा रे
जोवे जमी पर पग धरणा रे

नव सौ तो नदिया रे भंवरा निनाणू नाळा रे
पार उतरणा घणा दोरा रे म्हारा भंवरा रे

भाळ जोवे जमी पर पग धरणा
दास कबीरसा री विणती रे

जोणले हरि कारे कोई प्यारा रे

हे म्हारा भंवरा रे भाळ जोवे ने जमी पर पग
धरणा।

दोहा

1. कोरोना ने रोकणो, पेली रुकजो आप, नी रुकिया
जे आज तो, पछे रहत पछताप।
2. अठी-उठी नी जावणो, घर में कर विसराम, मान
सला सरकार री, पूरण होसी काम।
3. संकट री इण घडी में, सब करजो उपकार, भुखे
पेट गरीब नें, रोटी री मनवार।

बन्नी करावे मनवार

हाँ रे बनड़ी चुड़लो पेर थारे म्हारे कद को रुसणो
ए बोले कळजुग रा लोग, बन्नी करावे मनावणा।
बन्नी करावे मनावणा....

हाँ रे बनड़ी झुमका पेर थारे म्हारे कद को
रुसणो

ए बोले सैरा रा लोग बन्नी करावे मनावणा।

हाँ रे बनड़ी बरिया पेर थारे म्हारे कद को रुसणो

ए बोले कळजुग रा लोग, बन्नी करावे मनावणा।

हाँ रे बनड़ी चुड़लो पेर थारे म्हारे कद को रुसणो

हाँ रे बनड़ी पायलों पेर थारे म्हारे कद को रुसणो

हाँ रे बनड़ी बिछिया पेर थारे म्हारे कद को
रुसणो

ए बोले सैरा रा लोग बन्नी करावे मनावणा।

ए बोले कळजुग रा लोग, बन्नी करावे मनावणा।



सम्पर्क
निर्माण सोसायटी

तीसरी मंजिल, फ्लेट नम्बर तीन, गुलाब कोम्पलेक्स
सच्चियाय हेण्डलूम के पास,
तहसील रोड़ औसियाँ, जोधपुर राजस्थान-342303
फोन नम्बर-02922-274014

Email- rajasthanlanguages@nirmaan.org.in

Web- www.nirmaan.org.in